

KESAN KEMERDEKAAN TERHADAP NEGARA KITA

Politik

Pengamalan sistem Raja Berperlembagaan

Sistem ini meletakkan Yang di-Pertuan Agong sebagai ketua negara dengan bidang kuasa tertentu.

Demokrasi Berparlimen

Sistem ini memberikan kuasa kepada rakyat untuk memilih kerajaan dan pemerintah melalui pilihan raya. Rakyat mempunyai hak bersuara dan memilih wakil atau pemerintah negara yang akan menentukan hala tuju masa depan dan kesejahteraan negara. Parlimen mempunyai kuasa menggubal undang-undang pada peringkat Persekutuan. Dewan Undangan Negeri pula berkuasa menggubal undang-undang pada peringkat negeri. Sistem ini menjadikan undang-undang yang dilaksanakan lebih berkesan dan mampu memakmurkan negara.

Pentadbiran Negara

Tunku Abdul Rahman menjadi Perdana Menteri Persekutuan Tanah Melayu. Tunku Abdul Rahman mengekalkan jawatan ahli kabinet sedia ada. Dato' Abdul Razak Hussein dilantik sebagai Timbalan Perdana Menteri. Persekutuan Tanah Melayu buat pertama kalinya mempunyai Menteri Luar yang disandang oleh Tunku Abdul Rahman. Jawatan tersebut merupakn tanda kebebasan negara menjalankan dasar luar negara.

Cabaran Kerajaan Persekutuan

Cabaran Kerajaan Persekutuan adalah untuk menggantikan pegawai Eropah dengan rakyat tempatan. Penggantian tersebut sukar bagi bidang-bidang tertentu khususnya bidang profesional, pendidikan tinggi, keselamatan dan pertahanan. Tunku Abdul Rahman dan Dato' Abdul Razak Hussein melaksanakan penggantian secara berperingkat dengan melantik rakyat tempatan dalam pelbagai bidang.

Dasar luar

Kerajaan mengukuhkan Kementerian Luar. Kumpulan pertama pegawai dihantar ke Britain untuk mendapatkan latihan pada awal tahun 1957. Tan Sri Muhammad Ghazali Shafie dan Dr. Ismail Abdul Rahman dilantik sebagai Menteri Luar dan berperanan menentukan dasar luar negara. Dasar luar negara mula berperanan pada peringkat antarabangsa melalui Pertubuhan Bangsa-Bangsa Bersatu (PBB) dan Komanwel. Negara kita juga menjalinkan hubungan dengan Indonesia, India, Australia, New Zealand, Mesir dan Jepun.

Menganggotai Komanwel

Komanwel ialah pertubuhan sukarela yang dianggotai negara merdeka yang pernah dijajah oleh British. Setelah merdeka, negara kita diterima untuk menyertai pertubuhan Komanwel. Manfaat pertubuhan adalah untuk merapatkan hubungan sosioekonomi dengan negara ahli. Merupakan medan untuk negara kita mempamerkan komitmen terhadap isu yang dihadapi oleh negara anggota.

Pertahanan negara

Sebelum merdeka, negara kita dilindungi melalui kerjasama pertahanan Britain, Australia dan New Zealand. Selepas merdeka, Tunku Abdul Rahman ingin mengekalkan hubungan baik dengan Britain dan negara Komanwel. Negara kita masih belum mempunyai kekuatan pertahanan ketika itu menyebabkan negara memerlukan bantuan Britain. Oleh itu, termeterailah Perjanjian Pertahanan Anglo Malayan Defence Agreement (AMDA) pada tahun 1957.

Penyertaan dalam Blok Sterling

Negara kita menggunakan Pound Sterling dalam urusan perdagangan antarabangsa. Kedudukan Persekutuan Tanah Melayu sebagai negara berpendapatan tinggi daripada hasil getah dan biji timah memperkuat mata wang Pound Sterling. Kedudukan ekonomi yang kukuh dalam Sistem Keutamaan Tarif Komanwel (*Commonwealth Preferential Tariff System*) turut memperkukuh kedudukan ekonomi ahli-ahlinya.

Diiktiraf Pertubuhan Bangsa-Bangsa Bersatu (PBB)

Negara kita diterima menjadi ahli PBB yang ke-82 semasa persidangan PBB pada 17 September 1957. Bendera negara kita dikibarkan secara rasmi di ibu pejabat PBB di New York pada 15 Oktober 1957. Negara kita menjunjung prinsip PBB, iaitu untuk melindungi hak asasi manusia. Negara kita turut terlibat dalam misi pasukan pengaman PBB di Congo.

Ekonomi

Rancangan Malaya Pertama 1956 - 1960

Bertujuan meningkatkan pertumbuhan ekonomi negara dengan tumpuan pada sektor luar bandar. Kerajaan turut mempelbagaikan keluaran pertanian agar tidak terlalu bergantung pada hasil pengeluaran getah. Hal ini dapat mengurangkan kadar kemiskinan dengan meningkatkan lebih banyak peluang pekerjaan.

Lembaga Kemajuan Tanah Persekutuan (FELDA)

iDitubuhkan pada 1956 untuk memajukan tanah baharu secara besar-besaran bagi pertanian dan penempatan semula. FELDA memindahkan keluarga dari luar bandar ke rancangan tanah FELDA untuk menanam getah atau kelapa sawit. Kawasan perumahan dan kemudahan asas disediakan untuk peneroka.

Institusi Kewangan Tempatan

Malay National Bank atau Bank Kebangsaan Melayu yang merupakan bank pertama khusus untuk orang Melayu ditubuhkan oleh Maarof Zakaria di Klang Street, Kuala Lumpur. Pada 26 Januari 1959, Bank Negara beroperasi bagi menggalakkan kestabilan kewangan dengan menyediakan persekitaran yang kondusif untuk pertumbuhan ekonomi negara. Kwong Yik Bank ditubuhkan di Kuala Lumpur pada tahun 1913.

Pembangunan luar bandar

Kementerian Luar Bandar ditubuhkan pada 17 November 1959. Kementerian ini bertanggungjawab untuk membangunkan infrastruktur, sosial dan ekonomi luar bandar. Majlis Pembangunan Luar Bandar ditubuhkan pada peringkat negeri dan daerah bagi merancang dan menyelaraskan pelaksanaan projek pembangunan. Keutamaan diberikan kepada penyediaan kemudahan asas untuk penduduk luar bandar.

Rancangan Buku Merah

Dilancarkan pada 25 Januari 1961. Buku ini mengandungi projek berkaitan dengan kemudahan asas seperti jalan kampung, jambatan, surau, bekalan air dan bekalan elektrik. Pemantauan dan maklum balas berdasarkan rekod dalam Buku Merah diletakkan di Bilik Gerakan Kemajuan Negara pada peringkat daerah, negeri dan pusat.

Sosial

Pendidikan

Pendidikan ialah wadah untuk membina sebuah bangsa bagi negara yang bersatu. Penyata Rahman Talib dikeluarkan bagi mengkaji semula Penyata Jawatankuasa Pelajaran 1956. Penyata ini memberikan penekanan kepada bahasa Melayu sebagai bahasa pengantar di sekolah.

Penubuhan Dewan Bahasa dan Pustaka (DBP)

Fasal 1 Perkara 152 dalam Perlembagaan Persekutuan Tanah Melayu menetapkan bahawa bahasa Melayu hendaklah dijadikan sebagai bahasa kebangsaan telah mengukuhkan kedudukan bahasa Melayu. DBP ditubuhkan pada 22 Jun 1956 di Johor Bahru, Johor sebagai sebuah jabatan di bawah Kementerian Pelajaran.

Jabatan Penerangan

Ditubuhkan untuk menyampaikan maklumat berkaitan dengan peristiwa di dalam dan luar negara. Selaras dengan fungsinya sebagai lidah rasmi kerajaan untuk menerangkan kepada rakyat berkaitan dengan falsafah, dasar dan wawasan negara, terutama menjelang kemerdekaan dan pada awal negara merdeka.

Kesihatan

Pusat kesihatan dan hospital ditubuhkan untuk meningkatkan sosioekonomi penduduk luar bandar. Pada tahun 1957, negara mempunyai sebanyak 65 buah hospital. Kementerian Kesihatan berperanan dalam pemulihan isu sosial serta pembangunan masyarakat demi kesejahteraan rakyat.

Kemudahan asas

Kerajaan memberikan perhatian terhadap penyediaan dan pembangunan kemudahan asas seperti bekalan air dan elektrik demi keselesaan dan kesihatan penduduk. Kemudahan-kemudahan yang disediakan kerajaan adalah untuk meningkatkan taraf hidup masyarakat serta merapatkan jurang antara penduduk luar bandar dengan bandar.